

陳維崧集

下



迦陵詞全集卷十五

八節長歡〔一〕

乙巳元日

淑景驚催。畫梁日影，早漾粧臺。瞳矐金母帳，激灑玉人杯。宜春帖子簪花格，漸
闌中、珠網爭開。多少屏搖翠柏，勝鮀紅梅。
長安車騎朝正，青絲轡、火城影裏初
回。宮闕暖祥雲，嬉遊罷、誰憐江左鄒枚。休怊悵，喜吳娘、已醉春醅。屈指又、試燈挑
菜，且拾遺釵。

元日後二日積雨新晴偕大鴻雲臣散步城南望銅官一帶翠色眷戀久之不克游
南嶽而返

竟欲成村，似曾著雨，第五橋邊。盈盈臨水寺，脈脈弄晴天。溪痕入畫年光惹，醉
繞城、荻市茶船。最好雛春乍霽，帽側襟偏。
羣峯一笑嫣然，高低影、數行秀鬢堪

憐。揚袂倚風前，凝薄恚，迎人却又遷延。惱何事，未斜陽、客子將還。終有日、樓鞋筍屐，細續前緣。

【校】

〔一〕調 十五選「淑景」首。

卓牌兒

夏日咏閨人鬪葉子

遙窺兩重門，羣掩映、凝烟碧幌。卍字榻底，憑肩語笑，冰紋廊後，嬋鬢沉想。風流小南唐，金葉子、描鸞小樣。斑几滑笏玲瓏，蠟箋纖脆輕盈，打來偏響。七紅四賞，更花戳、京城新創。蘭闥似掌，儼楚漢情狀。贏得簾西紅鸚鵡，也隔屏山注望。私講，笑粉裝劉項。

聯吟爲閩牛叟賦

牛叟兌閣遺徵曰：「余填詞成，妻恒爲解頤。偶製杏花天三闋，妻索書素帕，

出入懷袖中。」

誰填杏花天，却滿幅、春愁無賴。鳳紙正疊，狸毫乍弄，籠鸚報道，娘來簾外。新詞

訝輕狂，一半是、狂奴故態。幾遍繞柱循廊，一回暗想胡猜，蹙他蛾黛。 瓶容旋解，畢竟是清新堪愛。烏絲小楷，要麝墨親灑。今日營齋營葬訖，石竹羅裙早壞。裙帶，字斜行還在。

天香〔一〕

中元感舊

夾路幡竿，盈城梵唄，分明元夜燈市。露濕巫簫，秋生賽鼓，頭上月輪初霽。金波激灩，還瀉做、萬家紅淚。天與玉容爭淡，烟飄粉裙偏麗。許多流鶯聲細，似啼猿、楚峽嘹唳。只有小墳新塚，誰修薄祭，空伴唐陵漢寢，都一樣淒涼野田裏。黃土鴉鳴，白楊風起。

咏桂

靈隱門前，番禺城裏，秋花一種清絕。碧海泠泠，金風陣陣，壓下數堆黃雪。山齋湖舫，說不盡、幽芬清冽。金粟一番開謝，冰輪幾回圓缺。曾經託根瑶闕，幾曾羨、人間風月。相伴蟾孤兔冷，羿妃偷折。自與廣寒輕別，記不起霓裳舊時闕。帶恨纔開，

和愁細結。

龍涎香

萬斛蛟螭，千堆蜃沫，沉沉碧海今夜。湘娥倚殿(二)，貴主還宮，新擣都梁無價。金盆煎處，趁月裏、桂華初謝。濃染鮫人茜淚，小襯馮彝冰帕。天風彩鸞斜跨，杜蘭香、水邊閑話。幾遍龍堂游戲，蓬萊乾也。多少望陵愁夢，空剩得分香雀臺瓦。散與人間，鬪他檀麝。

【校】

〔一〕調 蔣本、古今俱選「萬斛」首。

〔二〕湘娥 原作「湘蛾」，據蔣本改。

漢宮春(二)

送郝元公先生之任宛陵 先生梁溪廣文，視篆吾邑，今陞寧國府授。

秋色佳哉，剪綠帆半幅，與雁同飛。船頭新暘似雪，津樹霏微。後堂絲竹，記頻年、屢解談圍。真豪邁，傳經劉向，肯言心事終違。此去雲山萬疊，近天門牛渚，采石

蟪蛄。今朝臨風釀酒，往事都非。江聲千尺，推篷望、吟遍斜暉。偏相羨，敬亭山色，朝朝得上君衣。

送子萬弟入都次梁棠村先生送舍弟南歸原韻

此際東吳，正黃菊離披，紫螯郭索。作裝底急，使我傷於哀樂。西堂夜話，算曾經、幾番晦朔。又來朝，河橋判袂，匆匆弟酬兄酢。昔日揚烏項橐，須臾吾已老，鳳飄鸞泊。烏衣門巷，變做荳花籬落。半生牧豕，問何年、離蔬釋屨。喜予季，來春花煖，休恨一官祿薄。

附梁棠村先生原倡

雪霽燕關，有吳客將歸，越吟蕭索。池塘草色，夢入君家康樂。偶然杖策，逐寒烟、壯遊河朔。向市中，狗屠擊筑，相看壚頭酬酢。千里春風垂橐，歎秦川公子，梁園棲泊。長門價賤，誰識臨邛搖落。仲宣憔悴，賦登樓、仗憑春屨。且作達，狂歌對酒，莫問人情雲薄。

附史蘧庵和韻

楓冷江寒，歎雪浪奔鯨，霜簷啁鵲。蒲帆北渡，士雅英風如昨。睥睨淮泗，轢青

齊，醉吟河嶽。宕日弄，鞭梢未肯，輸人掀髻天廓。何須酒錢名橐，只干霄綵筆，
卽枚氣索。風嘶騃駉，笑指黃金臺閣。長楊賦奏，駭公卿、聞鐘長樂。天半倚，司空
耳語，識取芙蓉藏鈿。

附徐竹逸和韻

最愛元方，是名士風流，胸羅丘索。交同皮陸，對擲詩筒相樂。更欣難弟，氣如
虹，嘲楊戲朔。廿載梁園，愁旅食，今幸家園酬酢。休恨歸來空橐，但連牀夜話，
強於飄泊。塤篪迭奏，碧玉盤中珠落。酒酣慷慨，舞吳鉤、笑拋殘屨。且暫息，敞廬
風雨，郭外先疇原薄。

附緯雲弟和韻

二十年來，歎景物故園，依然蕭索。憑欄把手，聊復行歌相樂。無何烏榜，喚將
離、孟冬月朔。畫溪邊，紛鋪黃葉，冷雁寒雲酬酢。休悵敝裘虛橐，一枝如可借，
鶴鶴暫泊。松廳花署，也勝青氈拓落。得閑載酒，印牀開、漫攜雙屨。待他日，重尋
舊隱，桂樹共披幽薄。

附子萬弟和韻丁巳十月四日，弟自亳州復返商丘，將入都謁選，與余話別作此。

鷓首浦帆，看兩岸蕭蕭，千林索索。半生懷抱，大抵哀多於樂。塤篪纔和，早又

是、兄南弟朔。歎萍踪，歸來何日，再到故園酬酢。莫問此番行橐，且狂歌起舞，不妨飄泊。白屋公卿，休哂謝家中落。富貴浮雲，且還我、青山芒屨。銜杯笑，紛紛項領，何限眼中輕薄。

贈梁蒼巖先生次先生贈子萬舍弟原韻

綠鬢勳名，響上相韉刀，風生鈴索。籌邊多暇，細馬潛游平樂。神仙富貴，總兼之，笑他飢朔。擘詞頭，錦牋十樣，朝朝翠酬紅酢。前歲粵裝陸橐，正花洋珠海，樓船停泊。蠻天紅豆，爭向句中飛落。先生粵東集詩詞最工。獨憐愁客，老泥塗、蹉跎芒屨。幸當世，有公知我，莫管五陵輕薄。

立春後一日雨雪從友人齋頭醉歸紀事

婉婉熙春，有比鄰藥玉，計日安排。昨朝新做綵勝，綠剪紅裁。幾絲酥雨，釀濃陰，膩透銅街。今朝又，騰騰微雪，輕盈撲上人釵。便擬放顛衝酒，要粉搖歌袖，玉濺吟鬢。最喜銀裝世界，白佔樓臺。春泥沒屐，怪枯筇、難穩芒鞋。高樓上，雛鶯笑我，劉伶醉倒須埋。

春夜聽盲女彈琵琶詞

滿院梅風，攬一鈎纖月〔二〕，糝上簾鬚。檀槽有人慢撚，盤瀉珍珠。瑟瑟畫鼓，似開元、妙手花奴。奇哉技，飛揚感激，勝於讀史遷書。
太息東籬實甫，有無窮碗壘，墨染烟驅。一聲通仙鐵笛，碧海雲孤。青衫濕透，問伊憐、旁有人無？還相調，輕雲蔽月，今宵渺渺愁余。

【校】

〔一〕蔣本、〔瑶華俱選〕「滿院」首。

〔二〕攬蔣本、〔瑶華俱作〕「攬」。

雨中花慢

雨中過蘆庵先生宅看紅梅

白傅堂前，裴相庭中，一株濃艷垂垂。恰拖將輕雨，顰盡腰肢。絨索猩唇唾後，淚珠鵲舌凝時。似慊慊宿酒，慣趁朝粧，來暈春肌。
嫣然一笑，悄無人處，倚欄心事誰知。亟倩茜衫籠着，絳袖盛之。帶雪三分粉綻，愁陰一朵紅欹。還須囑付，小樓鈿

笛，莫漫頻吹。

燭影搖紅

丁未元夜

第一良宵，雨絲攪得愁心碎。六街鋪遍是春陰，火樹無人賽。年少俊遊不再，剩慳慳、夜情私耐。嬾提簫局，慵整衾窩，有些寒在。憶昔歡娛，墮釵小拾春城背。自

從圓月打頭來，照見狂奴態。直到收燈挑菜，歎如今、事隨年退。藕花裙子，紅漆車兒，拋人十載。

丁巳上元夜泊河橋

露驛烟莊，一般簫鼓千門沸。銀毬綵幔四圍紅，漾遍斜橋裏。曼衍魚龍百戲，鬧蛾兒、游童成隊。非無粉帕，亦有檀釵，暗中潛墜。回首春城，上元風景依稀記。今宵一棹纜烟汀，懶打看燈謎。且引村醪自醉，枕漁簑、和愁早睡。迢迢往緒，歷歷前情，付之流水。

帝臺春

五月南徐懷周翼微在都門即用其江上留別原韻

紅瘦成碧，鮒魚堆網白。悵殺年光，回首春前，旗亭錢客。公路浦君爲遠別，呂蒙城、我無相識。記曹家，園上看花，疎狂那夕。余別翼微於江上曹頌嘉園。高齒屐，黃金戟。行不得，愁何益。歎命不如人，雄姿俊侶，此日一齊拋擲。試詠洛生誰解作，擬邀麴部何從索。悶坐憶周郎，聽江聲千尺。

暗香（二）

東竹逸訊蔭綠軒前梅花消息

曉寒正側，悵今春天氣，連朝如墨。郭外小橋，幾樹紅香受寒勒。況是風前水畔，有多少、明粧傾國。也伴着、細雨輕烟，零亂翠簾隙。淒寂，正小極。似十五玉娥，舞困無力。僧樓伎席，記得常年暗香積。誰料誤他花信，偏則惹、粉腮輕濕。問甚日，

含笑覷，素英狼籍。

梔子花下有感

夜窗全黑，被一株梔子，凝來通白。拂水著烟，輕裊風枝送香雪。三十年前往事，曾記在、康崇坊宅。見小玉、羅袂亭亭，含笑趁涼摘。今夕，重露滴。總一任好花，滿院狼籍。暗巡花側，不見裙痕并鞋迹。提起同心兩字，人正隔、銀牆千尺。花在手，誰戴也，碎掇花擲。

吳靜安姑丈臨風閣上賞梅〔二〕

玉堂人物，況堦前瓊樹，一枝先發。近手花欹，小倚晴樓泛香雪。料理茶鐙棋局，更乍破、蛟冰芳冽。恰糝入、片片繁英，和取索郎啜。幽絕，恁時節。又脆管嬌絲，隔垣低揭。紅緘半坼，脈脈相看倍親切。若待盈枝爛熳，怕誤了、人生作達。薄醉也，壓帽是，一堆粉月。

【校】

〔一〕調 蔣本選「夜窗」、「玉堂」二首。

〔二〕題 「姑丈」，蔣本作「太史」。

八聲甘州〔二〕

月夜守風江店

對清光、一碧倚江城，獨立怨飄蓬。最惱人懷抱，危檣匝地，殘堞當空。遙想故園粧閣，擁袖側金蟲。歎息薰砧去，烟水濛濛。一派銀濤雪浪，瀉青銅鏡底，白雁聲中。料嫦娥清冷，此際與人同。且消停、三更茅店，任隔垣紫馬夜嘶風。消魂也、江愁衛玠，月想王恭。

南耕齋中食鱒魚作

汝魚乎、汝既弄潮來，何如趁潮歸。却波濤堆裏，橙齏香處，自許輕肥。千古斷磯黃鵠，不了是和非。貪聽漁翁笛，誤觸危機。謝汝崎嶇萬里，把浪花舞破，來慰晨饑。問途經西塞，果否颺旌旗。幸團圓、故園兄弟，況小窗雨後漾晴暉。浮生樂，無如斫鱸，安用呼豨。

寄宛陵沈方鄰兼懷梅耦長

記西風、握手秣陵隈，苦語勸君歸。歎尉佗城下，小姑山口，風景全非。方鄰久客西江

東粵。何事年年作客，牢落寸心違。且與王章婦，對泣牛衣。謝爾吾言竟用，果幡然歸葺，雲壑烟扉。更梅郎健在，酬和未應稀。只伶仃、畫溪野老，況今年烽火雁難飛。關情甚，敬亭栗罇，石白魚肥。

客有言西江近事者感而賦此

說西江近事最消魂，啼斷竹林猿。歎灌嬰城下，章江門外，玉碎珠殘。爭擁紅粧北去，何日遂生還？寂寞詞人句，南浦西山。誰向長生宮殿，對君王試鼓，別鵠離鸞。怕未終此曲，先已慘天顏。只小姑、端然未去，伴彭郎、烟水月明間。終古是，銀濤雪浪，霧鬢風鬟。

丙辰夏月蘆庵先生游廣陵諸同人以先生昨歲七袞補作詩畫奉贈初秋歸里持以示予遂於卷尾亦題一章

恰秋江、嫋嫋碧於烟，先生峭帆歸。有錦罽麝燈，芙蓉養紙，荳蔻緘題。更愛寫生妙手，烘染自蛾眉。花月揚州路，猶未全非。曾唱千秋歲引，向春燈掛處，滿泛玻璃。羨銅仙鶴髮，今古似公稀。偶重經、玉人橋上，惹羣真爭譜鷓鴣詞。閑披賞，蓴絲正熟，菰米剛肥。

【校】

〔一〕調 蔣本、瑶華俱選汝魚、「說西」二首。十五選對清首。

夏初臨〔一〕

本意

麥浪授晴，槐陰攔雨，小樓無限思量。九十韶華，誰憐歸去堂堂。屏山敞盡瀟湘。漸凌波、玉剪飛忙。此時天氣，今年情緒，大抵佹佹。天涯羈旅，煞甚淒涼。慣推中酒，怕說思鄉。江東故苑，正逢櫻筍時光。何日吳裝，傍柳綿、小泊斜陽。倚蟲娘，一春愁病，說與端詳。

本意 癸丑三月十九日，用明楊孟載韻。

中酒心情，拆綿時節，瞢騰剛送春歸。一畝池塘，綠陰濃觸簾衣。柳花攪亂晴暉。更畫梁、玉剪交飛。販茶船重，挑筍人忙，山市成圍。 驀然却想，三十年前，銅駝恨積，金谷人稀。劃殘竹粉，舊愁寫嚮闌西。惆悵移時，鎮無聊、招損薔薇。許誰知，細柳新蒲，都付鶉啼。

杜鵑花同雲臣賦

昨夜枝頭，問誰啼血，灑來併入花叢。縱使春歸，也須偷注殷紅。爲伊細數行踪。記鄉關、棧閣千重。曾隨花蕊，葭萌驛前，一路飄蓬。

淡烟粉水，斜月綿州，華陽士女，蜀國絲桐。便爲花鳥，魂猶戀此安窮。欲拜低頭，最憐他、姓氏相同。莫愁濃，溪山此間，不異新豐。杜鵑爲川中花，而吾邑亦有蜀山，故云。

雨泊泚練

柳盡籠橋，罾多界浦，片帆閃碎波光。鷓浪堆中，笛聲散入微茫。落花時候鳴榔。笑泚來、雪練何長。沙禽野鴨，啼晴喚陰，飛觸船窗。

颯焉颯作，倏爾溪昏，盤渦潏汨，紫鳳騰驤。濤奔萬馬，依稀屋瓦昆陽。且泊輕航，貰香醪、暫澣愁腸。漸昏黃，烟潭水樓，盡點銀釭。

立夏日雨中作

乍過花時，纔逢笋候，碧窗春去無蹤。似別情人，河橋愁盼征篷。打梅摘豆俱慵。正漫天、絲雨濛濛。夢回酒醒，巡簷倚闌，離緒重重。

一場惆悵，半榻瞢騰，暫攜溪老，閑訊漁翁。落花天氣，從君脫帽江東。綠滿長空，笑幾番、漢苑秦宮。暗簾櫳，玫瑰成陰，漸逗薰風。

【校】

〔一〕調 蔣本選「中酒」、「昨夜」、「柳盡」、「乍過」四首。十五選「麥浪」首。

〔二〕落花 蔣本作「養花」。

夢芙蓉

寒月

倍覺姮娥寡，奈金波早凍，素光空瀉。此時帝里，六館并三瓦。擁爐圍粉帕，疇憐
夜景如畫。讓碧空中，只一丸獨自，冷向鳳樓掛。除是賀蘭山下，老將營門，看得

分明也。清輝縱好，此外誰知者。長宵更鼓打，兔華莫也生怕。且待新春，點紅燈萬
盞，照着鬧娥耍。

月邊嬌

己未長安元夕

元夜年時，記水榭狂游，驛橋閑趁。梅梢月上，樓簷燈掛，媚蝶鬧蛾成陣。春泥鬆